

欽定剿平粵匪方略

欽定勦平粵匪方略卷八十四 甲寅年

三月初六日乙巳僧格林沁奏言臣連日督飭官

兵極力進攻該逆死守不出三月初二日豫派
馬步各隊官兵於夜半暗伏賊巢左近使前次
投出之甯宗揚等七名分向塔兒頭紅葉屯賊
巢聲喊引誘該逆由紅葉屯撲出三四百名由
東南關撲出二百餘名我兵俟其離巢較遠奮

勇壓下該逆力不能支狂奔敗退殄斃紅葉屯
賊匪二百餘名其東關撲出賊匪經侍郎慶祺
督帶兵勇殄斃多名餘匪退入賊巢正在設法
籌辦接據各路探報賊匪連陷金鄉陽穀等縣
逆燄甚熾勝保酌帶馬步官兵七千餘名起程
前進連善祿等所帶官兵合計一萬一千餘名
兼之山東本省官兵練勇足資堵剿臣原統京

旗及蒙古官兵七千餘名勝保酌留馬步官兵
一萬四千餘名侍郎慶祺統帶官兵二千餘名
共合二萬三千餘名勝保移營後臣正慮阜城
東北空虛雖商令德勒克色楞移營東北仍恐
兵單難恃適前任江甯將軍托明阿到營當將
直隸官兵一千餘名令托明阿統帶亦在東北
長濠之外駐紮與德勒克色楞互相聯絡現在

兵分勢單臣惟有激勵將士迅掃妖氛

同日張亮基奏言據探賊由鄆城北竄占踞張
秋鎮臣催督練勇正由山路前進一聞此報立
卽改赴湖路疾趨於三月初一日馳抵東平州
距張秋僅八十餘里又探賊由張秋攻陷陽穀
竄過莘縣直撲朝城西北顯因大兵將到聞風
而遁若不由朝城旁趨直隸必由冠縣堂邑北

擾臨清臣甫抵東平賊又改竄而所帶步卒每日疾行百數十里急難繞出賊前查東省自逆匪闖入後各屬土匪蠭起又聞黃河以南逆匪尙衆無兵防守紛紛續渡臣以一人兼顧實屬不及查臬司厲恩官業已帶兵回兗現將勦辦土匪事宜專委該司督屬嚴辦至臣所帶練勇僅二千餘人若以全軍盡躡賊蹤徒成尾追之

勢東平拏獲奸細供稱該匪有由臨清竄赴故
城接濟北賊之語因將所帶練勇分撥一半派
委遊擊玉山等分隊管帶馳詣朝城會同善祿
兜剿其餘練勇親自統領迅由間道馳往臨清
以待迎頭截擊如此兩面兜截中間又有善祿
在堂邑橫衝勦辦必可得手若防河一事前派
濟甯州黃良楷專司其事而金鄉鉅野魚臺等

處難於顧及同知高振洛曾任單縣頗得民心
且熟悉情形茲委該員趕募精壯民勇千餘名
在豐單交界處所實力巡防以杜南匪續竄惟
豐工南北兩岸均隸江南該處無兵扼守相應
請

旨飭下江南督臣南河河臣徐州鎮道迅撥重兵駐守
豐工以防逆匪續渡

張亮基又奏言頃接駐紮揚州之安勇等稟稱該員統帶兗曹等營官兵一千名現在三汊河駐紮該處情形較緩近時未派出隊查東省現在處處需兵此項官兵在揚旣無須常川出隊自當移緩就急應請

飭下琦善卽將該起官兵飭令安勇等管帶回東實於防剿有裨均奏入

上命軍機大臣傳諭僧格林沁勝保曰此次僧格林沁誘賊離巢殄斃賊匪二百餘名仍不過小有斬獲未能迅克賊巢勝保移營後阜城東北令德勒克色楞托明阿帶兵駐紮自應如此布置設該逆繞道北犯德勒克色楞西凌阿托明阿皆係幫辦大員儘可酌派一員督帶馬隊前往截擊若僧格林沁自行帶兵前往竟將阜城圍困之賊交德勒克色楞等剿辦該

幫辦等無所統屬事權不能歸一儻該逆乘虛竄出
與南來之賊互相勾結或仍由東北回竄交河等處
豈非該大臣貽誤此時逆匪竄擾清河勝保由故城
進剿必應力遏賊衝尤當設法兜截勿令逆匪繞越
朕思遠防不如近剿該逆知我兵由故城進攻或折
而西竄則棗強南宮冀州等處在在堪虞著僧格林
沁卽將雙禧等所帶官兵酌撥於保定迪南扼要地

方以勦爲防毋庸折回涿州阜城逆匪不過數千僧
格林沁尙有兵二萬三千餘名勝保亦帶兵萬餘兵
力不爲不厚若以兵分力單爲詞再事遷延是該大
臣等一誤再誤不能倖邀寬典也

上又命軍機大臣傳諭張亮基曰本日據奏報各情於
賊竄清河並未提及豈該逆已由東入直該撫竟茫
無聞見耶此股竄匪渡黃後連陷金鄉等處意圖北

竄自到山東所過州縣毫無阻滯如入無人之境張亮基統轄全省已屬罪有應得刻下勝保已帶兵由故城迎頭截擊遏賊北竄張亮基若不趕緊督帶練勇設法進擊爲兩路夾攻之計豈以賊匪竄出東境遂可卸責諉罪耶至各屬土匪卽飭臬司厲恩官痛加勦洗毋令與逆匪勾結並飭同知高振洛於豐單交界處所嚴防河口勿任南匪續竄

上又命軍機大臣傳諭琦善曰賊匪竄擾臨清一帶直東交界處所情形喫緊現在北路防剿重於南路不能不先其所急著琦善卽飭參將安勇遊擊毛三元將所帶官兵迅卽管帶回東以資防剿該大臣務當統籌南北大局力遏瓜州等處逆匪北竄是爲至要上又命軍機大臣傳諭楊以增百勝王夢齡曰現在偷渡逆匪竄擾山東陽穀等縣距臨清甚近爲數亦復

不少若再有逆匪續行偷渡恐勾結愈多更難剿辦
著楊以增等迅就現有兵勇於豐工兩岸各要隘嚴
密堵禦遏賊續竄前派秦定三赴徐會剿並吉連劉
玉豹所帶各兵是否趕到並著星速迎提以資防守
該督等屢誤事機罪無可追若再有疏虞國法具在
朕斷不能曲宥也

上又命軍機大臣傳諭桂明日昨因賊匪由莘縣竄入

直隸清河諭令桂明統帶官兵星夜渡河而北諒已
渡河由北岸行走著卽督率官兵迅速前赴直隸境
內沿途偵探賊蹤何路緊急設法追截若能出其不
意中途邀擊勦辦更爲得手萬不可稍有遲延

初七日

丙午

善祿奏言

臣探明賊匪由陽穀竄入

莘縣向西南張秋鎮而奔三月初一日卽取道
堂邑往臨清扼截初二日行抵臨清東南焦莊

地方賊匪由冠縣撲臨清城藩司崇恩已到賊
至城南黎官莊見有官兵不敢前進臣卽在焦
莊紮營遏其回竄堂邑東昌之路查黎官莊距
焦莊七八里夜間賊匪號火由黎官莊直達清
莊迤南往來不斷五更後臣令魁福帶馬隊往
臨清迤南堵其北竄臣同綿洵帶馬步隊從黎
官莊正南清莊進攻賊匪列隊出迎約數千名

我兵奮勇撲出相持兩時被我兵槍礮轟斃無數黎官莊迤北之賊見前隊已敗直奔牘口噍福在北堵截維時臣擊敗之賊飛奔牘口人數眾多遙聚河岸該逆豫先紮就木筏車載門板運至河干鋪浮水面擁擠渡河落水淹斃者不少適臣大隊繼至賊復整隊拒敵又經擊斃多名共殲斃賊匪約七八百名未渡河之賊奔回

臨清關外民房屯聚賊匪初遇大兵受茲懲創
頗足喪膽惟未能堵截賊匪北竄相應請

旨將臣從重治罪

同日崇恩奏言臣前奉勝保札帶山東官兵赴
鄭家口防堵節次探賊竄入東境攻陷金鄉鉅
野鄆城陽穀等縣臨清州勢甚危急該州爲水
陸咽喉有關南北大局斷無不救之理並奉撫

臣張亮基札飭帶兵赴臨於三月初二日馳抵
臨清賊已占踞城南二十五里之黎官莊臣所
帶之兵現存九百餘名卽在城外南關紮營嚴
密防範初三日卯刻賊隊大至分東西兩股每
股二千餘人繞撲城北當派參將吉興等分路
迎剿賊勢少卻而後隊續至因派副將慶順知
州張積功等守城臣同遊擊王用安等帶兵出

城接應酣戰三時斃賊數百名該逆恃衆不退
其大隊復在南關施放槍礮掣我兵勢臣復登
陴堵禦嬰城固守槍礮疊施賊匪屢攻屢退未
能登城而城外將弁兵丁無不一以當百奮勇
直前賊始退入村莊因卽收隊入城仍分布四
門梭巡防賊夜攻所有此次打仗守城出力文
武員弁可否由臣酌量保奏以勵士氣均奏入

上命軍機大臣傳諭善祿曰賊匪屯聚黎官莊該將軍
行抵臨清初次與賊接仗雖殲斃賊匪約七八百名
而該逆已渡河北竄善祿自應迅速渡河追剿與勝
保大兵合力夾擊爲一鼓蕩平之計斷不准藉口兵
馬疲乏遷延貽誤善祿等不能遏賊北竄已屬罪有
應得若再有疏虞不知奮勉國法具在豈能倖邀寬
典耶著卽督同桂齡迅將渡河逆匪合力殲除俟此

股渡河竄匪剿滅淨盡卽著馳赴臨清以南與張亮基等肅清東境勿令蔓延

上又命軍機大臣傳諭張亮基崇恩曰賊匪在黎官莊被官兵擊敗後隊賊匪直奔牐口紮筏渡河未渡河之賊奔回臨清關外民房屯聚顯係牽掣我兵分股渡河援應阜城之賊張亮基日內可到東昌著卽迅赴臨清嚴督兵勇奮力攻剿務當乘其喘息未定與

崇恩守城之兵內外夾攻悉數殲除斷不可閉門株
守此股未經渡河賊匪卽責成張亮基崇恩實力勦
辦儻令該匪續由臨清渡河北來朕惟該撫等是問
上諭內閣曰據崇恩奏逆匪直撲臨清州該藩司派吉
興等分路迎擊復派慶順等出城接應斃賊數百名
該逆復在南關占踞又經善祿等帶兵進攻斃賊七
八百名此次逆匪竄擾臨清崇恩督率將士等奮力

擊退所有出力官兵紳勇著崇恩酌量保奏善祿等
督兵進剿疊獲勝仗惟逆匪分股偷渡運河該將軍
等未能竭力堵禦實屬罪有應得善祿魁福均著革
職留任

同日和春福濟奏言據探逆匪由豐工下游之
包家樓平水處所紮筏北竄袁甲三等追剿不
及現在黃家口包家樓一帶尙有土匪盤踞袁

甲三百勝等所帶兵勇足資勦辦卽或土匪衆多亦有臨淮壽州兩處官兵可以酌量調遣臣等復加籌商似無須再行撥兵況秦定三由江南來廬並未帶兵此時既不撥兵赴徐秦定三自亦無庸前往惟廬城西路兵力過弱臣和春前請

飭令向榮將秦定三原帶之貴州鎮遠等營官兵趕緊

派撥一千名前來一俟到廬卽令秦定三帶赴西路統領督勦較爲得力奏入

上命軍機大臣傳諭和春福濟曰此股賊匪冒死深入原爲接濟阜城而來若和春等早能先事豫籌斷賊來路何至肆其狂奔分我兵力此時秦定三旣無庸前往徐州則廬州西北等處亟應密籌布置不但圍攻廬城尤當力杜南來匪徒續行北竄此時若專待

向榮撥到貴州官兵再令秦定三帶往已誤事機著
和春福濟卽酌撥官兵交秦定三帶赴西北一帶扼
要截勦或將撥歸袁甲三調遣之臨淮壽州各路防
堵官兵移交秦定三調遣欲固徐州之藩籬必嚴杜
皖省之竄匪和春福濟業經疏防於前若但知圍一
廬州而不顧賊匪由潁亳各處闖入徐界貽誤之罪
復將誰諉廬州逆賊雖被攻勦窮蹙尙未克復城池

和春等所統兵勇不爲不厚豈容藉口於城大兵單
遷延時日著卽乘勝克復毋再延緩

同日勝保奏言臣自阜城督兵起程初四日抵

鄭家口接據崇恩稟稱賊占踞黎官莊距州城
二十五里擊賊獲勝惟臣派善祿帶兵前往原

爲杜賊北竄並非專令其捍衛東昌東路乃至
今未聞與賊接仗賊踞黎官莊善祿旣在焦莊

紮營相距不遠何以初三日賊匪撲城崇恩接
仗善祿又未聞前往策應殊不可解臨清南關
現已文報不通張亮基初三日自東平州來文
內稱據探賊由莘縣竄至冠縣與直隸元城接
壤有往元城西竄之信自係探報未確查張亮
基初三日甫抵東平卽便探明賊蹤往剿已覺
緩不濟急臣思臨清固萬分危急必應趕緊赴

援但查鄭家口東爲德州前路西通清河縣實
爲扼要之區臣若竟舍鄭家口而赴臨清賊儻
舍臨清而繞趨北路中間無兵扼守賊仍可北
竄與阜城之賊勾結其患更深此次臣奉

命南來暫棄垂成之功爲籌全局之計重在遏賊北竄
不令勾結阜城逆匪今善祿張亮基兩路之兵
均未迎頭截殺臣若遽移兵往救萬一臣兵到

而賊已繞道北竄臣亦與善祿等同一落後此時南北通籌臣暫行紮駐鄭家口派總兵桂齡帶馬步官兵二千數百名馳赴臨清合力攻勦一面飛咨張亮基迅速赴援保全東路善祿設法繞道進兵合勦賊雖兇悍飄忽但勢同烏合且聞槍礮不多桂齡到臨清後如能會合善祿等併力夾擊賊鋒大挫殄滅無難臣卽可由鄭

家口折回阜城仍與僧格林沁合辦阜城之賊
如因衆寡不敵不能不痛加勦洗臣卽親帶官
兵馳往督勦奏入

上諭曰汝臨事酌度緩急料能胸有成竹儻桂齡前路
得手或能殲擒衆多汝在後路正可杜其豕突豈有
置而不問轉回阜城之理必致兩處貽誤咎將誰執
著隨時相機前進軍威一振逆魄應褫斷難專在鄭

家口待其竄至勾合然必須嚴防繞越亦不可疏忽
同日張亮基奏言查崇恩行抵臨清適賊圍撲
州城該司督兵開仗小挫賊鋒臣初慮賊蹤紛
竄心急如焚旋探賊已停留並搭造木城東西
南三面皆爲所踞東關之賊尤多臣卽於東關
外紮營誓將滅此朝食緣步卒連日趨程不無
疲乏現在趕緊擇地安營卽行嚴陣出隊臣偵

探賊勢雖衆其中長毛眞賊不過三分之一餘
皆裏脅土匪臣所帶練勇人雖不多磨厲以須
似尙可用現聞將軍善祿在該州南門外安營
臣當晤商一切奏入

上諭曰該逆分股過河仍復占踞臨清意圖牽掣我兵
逞其逆鋒昨有旨催善祿往北緊追今觀汝奏欲與
伊會商朕恐汝留下善祿或善祿亦藉詞不進則斷

不可汝所帶練勇既可自信足敷剿辦李湘棻能否得力著隨便奏聞斷不准因係本省大紳稍有回護賊情變幻靡常此數日又不知若何情形若臨清勢緩汝仍應迅往北來夾擊爲是不可託故觀望

同日前漕運總督李湘棻奏言臣統帶兵勇往援徐州茲據探賊匪已陸續紮筏渡河北竄臣聞信之餘萬分焦灼因思此股賊匪意在救援

北困之賊山東重兵全在北路南路實形空虛
與其由徐州尾追不及莫若徑趨濟堯一帶抄
出賊前迎頭勦擊臣共帶兵勇一千二百餘名
雖兵力稍單而當萬分喫緊之際自當力籌堵
勦現在分起前進激勵將士誓掃賊氛冀稍分
聖主南顧之憂奏入

上諭曰汝以革任大員猶單銜奏事並未有與賊接仗

迫不可緩之勢殊屬妄爲李湘棻著降爲三品頂戴
伊若奮勉出力朕必格外加恩若遇賊接仗大獲全
勝方准專摺具奏

初八日丁未載齡奏言臣體察現在形勢南來賊

匪旣竄至清河縣屬之小灘地方係在保定府
迪南而阜城之賊又未殲除訊據獲賊供稱賊
匪因東邊有水北邊有兵欲圖西竄等語是涿

州最爲近畿要隘臣擬將原帶官兵一千名擇精壯者數百帶赴涿州駐紮至固安縣現在河水漫溢似覺不甚喫重惟逆匪狡獪恐我兵全赴西路卽乘虛竄入固安應請

旨飭下侍郎文瑞卽赴固安管帶阿彥達所留官兵駐紮防堵方爲周密臣俟文瑞到固安後卽行帶兵起程奏入

上命軍機大臣傳諭載齡曰涿州雖有烏爾棍泰帶兵
在彼駐紮深恐未能得力載齡自應親赴該處以資
防守該侍郎俟文瑞到營迅卽移營涿州未起程以
前所有涿州等處防堵事宜仍著載齡隨時妥籌嚴
密布置並飭烏爾棍泰認真防範毋得稍涉大意
上諭內閣曰刑部侍郎文瑞著俟病痊銷假後卽行馳
赴載齡軍營

同日百勝王夢齡奏言據探逃回永城逆匪約有二千餘人意欲仍歸六安於二月二十七日行抵潁州東南之迴溜集該處有沙河一道被團練兵勇在南岸截擊不得過渡經袁甲三帶兵馳往可期南北夾攻等情查此次逆匪由六安竄出自正陽關潁上蒙城永城夏邑直抵徐境沿途並無堵禦臣等屢獲奸細供稱逆匪自

六安起程係分三起行走迨抵徐後陸續踵至
併爲一起現在欲杜續竄之賊必須在六安正
北之霍邱縣又東北之正陽關派撥重兵扼堵
庶該逆無路可越應請

飭派大員迅速帶兵前赴霍邱縣及正陽關扼要防守
嚴遏來路實於大局有裨

同日袁甲三奏言臣前因北竄逆匪追剿不及

奏明折回南路行抵睢溪口據探渡河餘匪另
有一股自碭山境內之定國寺竄出經該縣督
同團練殲斃數百人餘匪約有二千仍向永城
一路竄去旋探該逆已至永城之丁陳集該處
西通歸德之路有徐廣縉布置堵禦諒亦不敢
窺伺若向西南而去距河南之鹿邑安徽之亳
州太和均在二百里內外查由永城至潁州府

數百里平原無險可扼惟有府城外沙河一道
尙可據以爲險當卽飛飭潁州府並飛諭該處
團練於沿河兩岸嚴密防禦但能攔住一二日
臣卽可以趕到旋探該逆於二月二十七日分
爲兩股一撲迴溜集一撲劉伶口乘北岸兵勇
不及兼顧搶船搭橋兩股合一卽時擁渡盤踞
南岸二十九日全數下竄我兵趕追三十餘里

該逆豫有奸細自下游備船接濟揚帆直下已抵正陽關一過正陽卽係六安本爲該逆占踞萬難追勦臣所派兵勇回至大營現飭派駐壽州之參將劉玉豹及該州金光飭極力防禦以現在情形而論非調精兵三四千督以重臣恐南北之關鍵已失卽令廬城克復其患仍無底止應請

速派大員帶兵移紮或

飭令和春福濟等迅速布置臣拜摺後卽馳赴王市集
就近查看情形如可留兵勦辦臣卽折回宿州
均奏入

上命軍機大臣傳諭百勝王夢齡曰逆匪竄入徐境該
紳士等挑選民勇竭力扼防並隨同官兵堵禦追勦
俾蕭碭縣城得以保衛尙屬奮勉著百勝王夢齡擇

其尤爲出力者酌請獎敘至該地方文武員弁本有
守禦之責乃任賊偷渡黃河不能堵截已屬罪有應
得惟念守禦縣城尙無疏虞姑免置議著百勝等督
率兵勇紳民將南來逆匪實力防勦毋令續有偷渡
上又命軍機大臣傳諭袁甲三曰據百勝等奏永城賊
匪在潁州迴溜集地方被民勇截擊不能竄回六安
並有經袁甲三帶兵馳往之語現在廬州迤北逆匪

土匪充斥紛擾秦定三在西北一帶堵截未能專顧
徐州百勝等又不能離城遠出該處帶兵大員僅止
袁甲三一人袁甲三所帶兵勇爲數不少豈可株守
宿州不爲進剿之計正陽關一帶雖有劉玉豹撥兵
駐守其六安迤北之霍邱縣亦爲南賊北竄要路和
春等但知圍一廬州固難辭咎然北路不能兼顧亦
係實情袁甲三若仍專駐宿州則潁亳歸陳一帶將

聽匪黨橫行置之不問耶著卽督現帶兵勇趕緊勦
辦務將廬州北路賊匪悉數埽除並嚴杜逆賊自六
安一帶續來之路與河南防勦兵勇合力兜截壽州
臨淮兩處防兵應如何移緩就急以勦爲防之處著
和春福濟妥籌酌撥

同日善祿崇恩奏言逆匪圍攻臨清州城自初
次接仗後卽將南門外街巷民房全行占踞晝

夜對城轟擊東西兩面亦復如是到處豎立雲梯捨死攀上經守城員弁兵丁轟擊斃賊無算該逆於南門甕城下暗設地雷初五日卯刻轟陷月城及外城樓一座乘隙吶喊搶登兩旁兵丁奮力攻殺殲斃賊匪數百名隨將轟塌月城趕用木柵堆土攔護適臣善祿統兵繞至北城與臣崇恩趕緊設法協同會剿並聞勝保張亮

基均各分路帶兵前來晨夕可到臨清臣等惟有勉保危城力杜匪蹤北竄奏入報

初九日

戊申

僧格林沁奏言查阜城現已周圍挑

挖長濠各營官兵尙足堵禦

臣

前聞南匪勢甚

猖獗恐勝保善祿不能遏其北犯易州紫荆關一帶爲至要之地原擬探得警報卽先其所急

聖裁

直前橫截現在勝保張亮基等計期均可趕赴
臨清臣自當在阜城大營迅速奏功不敢稍事
延宕其雙禧等所帶官兵可否飭令前赴易州
紫荊關擇要屯紮伏候

同日勝保奏言臣催督官兵於初六日至清河
縣屬之油坊鎮地方距臨清三十餘里探聞賊

衆約有三三萬人粵匪數不盈萬另有潰勇四
五千人投入逆黨係李三開爲首餘皆安徽捻
匪被粵匪邀結而來此股賊匪自豐工渡河分
三股北竄至張秋合爲一股疾趨千餘里屢陷
城池衆至數萬聲言救援阜城賊匪統計臣及
善祿所帶馬步官兵僅及萬人現因善祿桂齡
等所帶馬步隊俱紮東岸恐西岸空虛已先行

派撥馬隊三百名趕赴臨清西岸防賊西竄查
臨清州爲南北衝要亟宜乘其全股蟻聚之時
重兵合剿以期聚殲臣卽刻齊隊馳赴臨清或
渡河會合剿辦或卽在河西攻奪浮橋遏賊向
西竄路臨時再行相度地勢辦理現在西岸道
路紛歧在在緊要此股賊匪一經大兵攻剿勢
必窮而思竄臣所帶馬隊僅二千餘名不敷追

勦應請

飭下僧格林沁於多爾濟那木凱馬隊到阜城時或派
德勒克色楞帶馬隊千名或派明慶烏凌額帶
馬隊千名飛速前來以資勦辦均奏入

上命軍機大臣傳諭僧格林沁曰南來逆匪大股盤踞
臨清州城外衆已數萬該州爲南北水陸要衝雖經
善祿崇恩竭力守禦深恐兵力單薄不敷勦辦已諭

令勝保統兵進剿惟勝保所帶馬隊僅二千餘名著
僧格林沁迅由阜城大營內挑撥馬隊一千名卽日
交德勒克色楞統領前往勝保軍營以資勦辦至所
請移兵易州紫荆關之處原爲擇要駐守起見但以
現在軍情而論阜城餘寇未能殲滅而東境逆勢方
張自應扼守來路可期以防爲勦所有雙禧穆輅原
帶官兵二千名著仍遵前旨於保定迤南一帶扼要

布置既可固省垣根本兼可爲勝保後路聲援但能
於前路堵截則西北易州一路自可無虞該大臣勦
辦此股逆賊究竟何日可以蕝事應如何設法智取
爲埽穴擒渠之計著卽趕緊籌策毋再遷延玩誤

上又命軍機大臣傳諭勝保曰逆匪攻擾臨清州城情
形甚屬危急桂齡善祿會攻賊巢殲斃多名該逆仍
堅匿不出州城尙未解圍勝保刻下亦必馳抵臨清

卽著與善祿等設法分路勦辦並與張亮基崇恩妥籌內外夾擊務將此股逆匪趕緊殲擒勿令奔突大名等處更滋蔓延現在涿州一帶防堵亦關緊要多爾濟那木凱所帶察哈爾馬隊未便遽行撥赴阜城惟勝保勦辦賊匪正在喫緊之際已諭知僧格林沁飭令德勒克色楞迅帶精銳馬隊一千名馳往該大臣軍營並令雙禧穆輅帶兵二千駐紮保定迤南防

賊北竄著勝保酌量情形相機調遣扼要布置一面
咨催德勒克色楞所帶馬隊一面就現有兵勇極力
截擊毋得專俟該貝子馬隊兵到始行進剿致有貽
誤

同日

上命軍機大臣傳諭和春福濟曰潁亳一帶土匪蠭起
永城逆匪雖已由正陽關奪船回竄六安等處難保

其不去而復來和春等圍攻廬州固應迅圖克復但
逆匪西繞六安乘機紛竄處處可以北犯大兵全力
專注廬州而正陽關門戶洞開僅恃劉玉豹千餘兵
勇豈能堵遏況和春等連日奏報並無圍攻之策不
過賊出與之接仗賊歸卽計無所出大軍全駐東南
正陽關一路任賊往來紛紛北竄總不肯遽爲抽撥
貽誤之罪其何能辭朕以皖省全局委之和春等並

非專令株守廬州也本日已諭袁甲三由宿州進駐
臨淮扼廬州東北之衝其西北一帶壽州霍邱正陽
關等處卽著和春等添撥兵勇飭令秦定三管帶扼
要防剿秦定三抵正陽關後或應進攻六安或應沿
河迎剿以分廬州賊勢並杜逆匪北竄之路均著隨
時審度機宜向前截擊亦非令其事事防堵避難就
易若逆匪再由西面繞越北來秦定三不能以剿爲

防朕必重治其罪

上又命軍機大臣傳諭袁甲三曰昨據袁甲三奏請派大員帶兵駐紮正陽關本日已諭知和春福濟令秦定三帶兵前往現在永城敗竄賊匪已由正陽關南竄六安袁甲三追剿不及仍欲折回宿州該州爲徐亳適中之地而臨淮爲前路要隘必須兼顧今正陽關一帶有秦定三扼守可以杜賊竄突穎亳之路惟

臨淮要隘僅有吉連等在彼防堵兵力尙單著袁甲
三卽帶得力兵勇迅速前往扼守臨淮督同該處防
兵遏賊北竄儻有土匪勾結滋擾仍隨時派兵勦辦
並可與秦定三劉玉豹聯絡聲勢俾廬州賊匪不敢
北窺如賊由鳳陽左右分股渡河或擾及定遠均惟
袁甲三是問該給事中仍須統籌全局不得株守臨
淮幸賊蹤尙未及關謂可塞責也

初十日己酉載齡奏言查涿州固安爲京畿要隘

理宜嚴密設防固安留兵二百餘名尙形單弱
臣已將所帶官兵除酌帶六百八十名移赴涿
州外其餘兵丁三百名俱留駐固安足資防守
易州尙屬空虛不得不早爲防備擬將良鄉官
兵令珠勒亨管帶馳赴易州擇要駐紮其黃村
官兵令都爾通阿帶赴良鄉防堵奏入

上命軍機大臣傳諭載齡曰昨據僧格林沁奏請移兵
紫荊關一帶扼守山路當以阜城餘匪未淨臨清賊
勢方張不得以有用之兵置之無用之地仍令雙禧
穆輅帶兵赴保定迤南扼要布置聽候勝保調遣以
剿爲防如能遏其來路則易州一帶自可無虞載齡
請令珠勒亨駐紮易州之處著卽無庸前往良鄉一
路又添都爾通阿之兵亦可與固安互相策應著嚴

飭該員等加意防範不准稍有疏懈本日復諭恆春將綏遠城備調駐防官兵一千名調赴紫荊關一帶駐紮如該處情形喫緊亦可就近調遣

上又命軍機大臣傳諭恆春曰綏遠城官兵一千名前准該撫調赴省城此時晉豫交界防勦情形較緩著卽派赴紫荊關一帶扼要駐紮聽候調遣

同日百勝王夢齡奏言據探六安被匪占踞該

處無兵堵禦恐復乘虛北趨臣等敢不竭力布置惟徐州祇留有大同兵九百名又鎮標兵二百六十七名內除派赴豐碭防守黃河北岸兵六百名又派防包家樓碭山等處兵四百名郡城僅存官兵一百六十七名練勇一千餘名所有前留民勇一千二百名訓練尙未純熟前調秦定三及各路援徐之兵均未接有來徐文報

前清臣李湘棻帶兵行至宿遷因聞東省緊急
又改赴濟甯一帶援剿臣等惟有帶領現存兵
勇在徐城以西之九堡地方夾岸分守並在附
近各處設險布伏不使賊匪紛趨一面曉諭團
練按段巡邏以助聲勢再豐碭二縣所轄之黃
河北岸綿長百餘里刻下僅有大同兵六百名
不敷防守應請

飭派山東按察使厲恩官帶兵移紮豐碭黃河北岸萬
一厲恩官及秦定三均赴別處進剿未克前來
臣等當另籌添撥以資防剿奏入

上命軍機大臣傳諭百勝王夢齡曰據奏現籌防禦情
形仍以兵力不足爲詞並因秦定三援師未到請飭
厲恩官移紮豐碭黃河北岸徐州爲江南重鎮南北
要衝自應嚴密防範而欲固徐州之藩籬尤必斷皖

匪之來路昨令秦定三帶兵與劉玉豹扼守正陽關
袁甲三進紮臨淮東西兩路力遏賊鋒則徐州一帶
亦可藉資保障此時厲恩官已折回山東隨同張亮
基勦辦臨清竄匪李湘棻亦帶兵勇在曹沂等屬勦
辦土匪百勝等仍著督飭現有兵勇夾岸分布並諄
諭鄉團一體巡緝勿稍鬆懈張亮基前請調回參將
安勇等原帶兗曹各營官兵一千名已令琦善飭令

迅速回東如此項官兵過徐或可暫留協防之處著
百勝王夢齡酌量辦理毋得一意株待致皖匪陸續
偷渡亦不得因徐州前路有秦定三袁甲三等帶兵
堵截轉於徐境遂不設備也

十一日

庚戌

勝保奏言

臣

於初七日行抵臨清卽

親赴河東相度地勢州城東南西南三關地面均
爲賊踞賊衆約三四萬當與善祿商定乘勢合

力進攻該逆大股叢擁而出我兵俟其撲近開
放連環槍礮賊衆紛紛倒地馬步官兵直前截
殺立斃賊二三百名賊始敗入村內兵勇連拋
火彈延燒村屋賊冒煙突出復經兵勇擊殺百
餘名我兵連日趨程喘息未定力戰多時方始
收隊獲賊及逃出難民僉供賊意亟欲援救阜
城儘不能直達阜城亦欲由他道北犯等語臨

清地勢三面運河環抱西南又有漳河可通大名臣所帶之兵分撥東西兩岸每處馬隊不過千餘名步隊二三千名僅能遏賊由東西兩岸北竄之路而漳河以南尚不能分兵兼顧現在城外東西南三面關隘俱爲賊踞非有官兵四五萬不能合圍查善祿張亮基所帶兵勇俱有數千本云迎頭截殺詎意賊匪未到臨清以前

俱未遇賊接仗以致州城被圍城外關廂賊得踞爲巢穴幸臣現已趕到州城或可無虞茲撥出官兵四百餘名設法令其入城助守一面飛催張亮基卽日移營前進與臣會商辦理應請旨速行添調官兵來東助剿庶兵力厚集易於奏功

勝保又奏言接據德勒克色楞初六日函稱僧格林沁擬卽親帶官兵南下堵禦其阜城之賊

奏留德勒克色楞及慶祺瑞麟在彼防其北竄
等語伏思臣分兵南向之時已慮阜城之賊伺
隙而竄恃有僧格林沁及達洪阿在彼可以相
機勦辦今若帶兵前來阜城甚覺空虛臣以爲
萬不可行應請

旨速飭僧格林沁無論起程與否必須仍駐阜城力圖
圍剿奏入

上命軍機大臣傳諭勝保曰逆匪竄擾臨清現在城外
東西南三面關廂俱爲賊踞匪衆雖至三四萬其中
多係裹脅之人勝保請多調官兵圍剿現在阜城之
兵剿辦正當喫緊難再調撥前諭桂明帶兵二千餘
名徑赴直隸並諭恆春迅撥澤潞防兵一千名赴大
名一帶著該大臣迅速迎提張殿元是否已抵大名
並著飛催前進所有桂明張殿元之兵均歸該大臣

酌量調遣至僧格林沁欲親帶官兵迎剿本無如此辦法前已諭令仍駐阜城一俟埽穴擒渠即可與勝保合軍勦辦南來之賊若臨清逆匪乘間竄越直境朕惟勝保是問逆匪雖恃衆猖獗斷不可先存畏難之見務當督飭善祿張亮基等迅速進攻勿令負隅久踞及分股北竄致干重罪善祿張亮基先後由景州阜城督兵迎剿何以於賊未到臨清以前俱未遇

賊接仗以致州城被圍城外關廂賊得踞爲巢穴著
勝保確切查明如有遷延觀望情事卽著據實嚴叅
上又命軍機大臣傳諭僧格林沁曰此股南來逆匪意
在援應阜城並有繞道北犯之意必須於前路厚集
兵力遏其兇鋒著僧格林沁卽飭德勒克色楞額日
督帶馬隊一千名前往勝保軍營毋稍遲誤阜城距
臨清甚近該大臣惟當趕緊設法籌攻迅圖蕝事如

臨清之賊北竄惟勝保是問如阜城仍不能卽日克復以致賊匪突圍而出又滋蔓延惟僧格林沁是問上又命軍機大臣傳諭桂良曰南來逆匪已竄至臨清城外該州爲南北衝途三面濱臨運河其漳河一路可達大名現獲奸細訊供有逆匪若未能直接阜城便有繞道北犯之說直東接壤處處可通而大名尤爲扼要張殿元達年等是否趕到著該督迅卽嚴飭

該署提督等與地方文武於要隘處所嚴密設防加
意堵截其武邑防守事宜亦須先期布置務臻周密